

四庫全書

經部

欽定四庫全書

經部

周官集傳卷三

詳校官監察御史臣徐如澍

刑部郎中臣許兆椿覆勘

謄錄舉人臣黃道斐

監生臣黃洲

欽定四庫全書

周官集傳卷二

元 毛應龍 撰

小宰之職掌建邦之宮刑以治王宮之政令凡宮之糾禁

鄭鑄曰小宰以中大夫二人為之大宰之貳也 應龍曰小宰為十二小卿之首掌者職所專主也建邦之宮刑者自立國以來之法即王宮之政令與凡宮之糾禁是也王宮有禁衛官府次舍庖膳醫藥酒漿

貨賄徒役之政令政者出入功緒稟稍之等令者作
止期會告戒之事糾以察其隱匿禁以止其邪僻刑
如儀刑之刑不專以刑罰言也大宰總馭內外之官
府為一小宰則與內宰對掌王宮王內之政令有內
外之異至宰夫掌治朝之法則又王宮政令之一事
也此長貳之分別也 陳君舉曰按大宰之屬小宰
掌外治凡與王左右親習之官隸焉內宰掌內治凡
與后親習之官隸焉

掌邦之六典八灋八則之貳以逆邦國都鄙官府之治

大宰正月布治施六典於邦國施八法於官府施八則於都鄙其書之副小宰掌之至歲終上計則各以其副迎受而考其同異凡施以典者逆以典施以法者逆以法施以則者逆以則典必合於典法必合於法則必合於則然後謂之治

執邦之九貢九賦九式之貳以均財節邦用

歐陽謙之曰執者有一定不可移易之意 應龍曰
貢賦致其均式用有其節凡六典八法八則之治治
在大史者大史逆之治在司會者司會逆之治在小
宰者小宰逆之三官之所逆大宰仍以典法則待其
致事待者舉其綱逆者詳於目九貢九賦九式之治
大宰所制小宰佐之司會計之大府受其成法而出
入之也

以官府之六叙正羣吏一曰以叙正其位二曰以叙進

其治三曰以叙作其事四曰以叙制其食五曰以叙受其會六曰以叙聽其情

前云以八法治官府此云以官府之六叙正羣吏吏即庶人之在官者冢宰有禮絕之敬正者先尊後卑各依秩叙位者朝位治者職業事者功叙條目食者邑祿稍食會者成歲會計情謂辭訟情實聽斷之時各以其序自此以下六叙六屬六職六聯八成六計凡六條即上文所謂典法則貢賦式之貳也又曰吏

之說不一或以為自大夫以下或以為士以下或以為總六屬之吏鄭鏐因大計羣吏之文欲并卿以上言之攷諸經之冢宰以八則治都鄙而有官府之分秋官三刺之法有羣臣羣吏萬民之別官與吏不同名臣與吏不同位故大宰曰馭羣臣小宰曰正羣吏自有截然之辨陳氏曰六叙在前六計在後此是攷課法中間皆是官吏事有尊卑有先後有緩急以叙正其位者定尊卑也治者功狀也謂如今日朝諸侯

且先還諸侯奏功狀其它不袞在這裏以叙作其事者謂如今日理會朝諸侯事則朝事在前其他在後今日理會祭祀便是祭事在前其他又後爾制其食亦有叙如聽其情須是一人聽了一人再說纔是有體統朝廷上將六叙去區處百官便有六計去察他今一人善便察得見他如此善各各察他自然無遺材

以官府之六屬舉邦治一曰天官其屬六十掌邦治大

事則從其長小事則專達二曰地官其屬六十掌邦教
大事則從其長小事則專達三曰春官其屬六十掌邦
禮大事則從其長小事則專達四曰夏官其屬六十掌
邦政大事則從其長小事則專達五曰秋官其屬六十
掌邦刑大事則從其長小事則專達六曰冬官其屬六
十掌邦事大事則從其長小事則專達

賈氏曰六屬舉邦治者謂官盛任使 應龍曰官盛
任使所以敬大臣也凡官各有屬而屬各有長達猶

行也大小者指事之體而言事雖畧而所繫者重必從其大事雖繁而所繫者輕亦得專達六官之屬皆曰六十舉成數爾

以官府之六職辨邦治

六職與六典之文若相近似而義有不同六職無官府一節蓋是以官府所守之法為職也自邦國萬民之外又各舉官府之一事以明小宰職之所當治者切而財用遠而賓客明而百物幽而鬼神隱而盜賊

無不揆之有道治之有法其職辨其治亦辨矣鄭
錡曰小宰六職言邦國萬民而獨不言官府蓋所謂
治職者官府之治也教職者官府之教也禮政刑事
則官府禮政刑事也

一曰治職以平邦國以均萬民以節財用
均者致其平在下則言均在上則言節
二曰教職以安邦國以寧萬民以懷賓客

寧則雖有不安者亦置之安懷亦安也田野闢道路

通廬宿館候各有委積

三曰禮職以和邦國以諧萬民以事鬼神

禮主和和而後鬼神享

四曰政職以服邦國以正萬民以聚百物

四方無虞萬物各由其道

五曰刑職以詰邦國以糾萬民以除盜賊

詰之使不容奸糾之使不為非國不容奸民不為非則盜賊除矣

六曰事職以富邦國以養萬民以生百物

居四民時地利春秋傳曰時以作事事以厚生

以官府之六聯合邦治一曰祭祀之聯事二曰賓客之聯事三曰喪荒之聯事四曰軍旅之聯事五曰田役之聯事六曰斂弛之聯事凡小事皆有聯

祭血祭祀禋祀享先王亦曰祀祭祀吉禮喪喪禮荒荒禮軍旅田役皆軍禮田以簡衆役以任衆斂者斂民之財弛者弛民之力鄭氏曰荒政弛力役此六

聯合治者如大祭祀大宰贊玉幣司徒奉牛牲宗伯
奉玉鬯司馬羞魚牲奉馬牲司寇奉明火之等謂
祭祀之聯也餘小事亦皆有聯凡六官之屬各與其
六十屬之同官為聯各官亦自為聯謂膳夫之屬庖
人內外饗亭人自為聯酒正之屬酒人漿人為聯而
膳夫酒正又各以其事為聯又如膳夫上士二人為
聯中士四人為聯下士八人又為聯府二人聯史四
人聯胥十有二人徒百有二十人又自為聯聯則有

合而不散之義惟聯故合也

以官府之八成經邦治

八成即大宰八法官成之貳也官成所以待萬民之治於事為詳然各有舊章品式可依據行之凡民物之數簿書圖籍之事皆一定而不亂者

一曰聽政役以比居

比居者猶五家為比之比並居相次各有伍籍凡聽賦役使之事則以地之比居為據

二曰聽師田以簡稽

師所以用衆田所以簡衆簡者閱而選之稽者計而考之

三曰聽閭里以版圖

有民人之事則以民數之版聽之有土地之事則以地域之圖聽之猶今保伍之政

四曰聽稱責以傅別

稱如孟子云又稱貸而益之之稱責者責其所償傅

者朝士所謂地傳謂若將來亡其人則指其地為證
別謂以一札破而為二所謂凡有責者有判書以治
則聽

五曰聽祿位以禮命

鄭諤曰禮則國家宮室車器衣服之儀命則一命至
九命之數可以斷其祿位之所當得 應龍曰祿如
卿祿四大夫倍上士之祿位如卿一位大夫一
位之位禮者數命有等如九儀九命之等凡授祿賜

位以此為之制

六曰聽取予以書契

書契一執其一子者執左取者執右合而驗之以行其取予凡曰別曰契皆要也稱責謂別則其用以別為主取予謂契則其用以契為主

七曰聽賣買以質劑

賣買商賈之治釋者曰長曰質短曰劑地官質人之職曰大市以質小市以劑案質者立之佑而人為之

徵劑者前後作二契於中央破之兩家各得其一皆
有手所書字異於傳別也夫結繩作而有書契書契
不足而有質劑質劑不足而有傳別此取予買賣稱
責三者所用有輕重大槩契憑書為信劑憑人為質
別憑地為傳也 鄭鍔曰長曰質短曰劑者以所期
久近言之也大曰質小曰劑者以所約多寡言之也
八曰聽出入以要會

出謂給以用者入謂受而藏之者月計曰要歲計曰

會凡財物之出入聽之以月終之要歲終之會又按
以上八成之物皆文籍也政役師田閭里稱責祿位
取予賣買出入八者為定名所謂常也比居簡稽版
圖傳別禮命書契質劑要會八者為徵驗所謂成也
簡稽禮命要會用於公者比居版圖傳別書契質劑
官民皆用之非有司法守之嚴凡民何所措其手足
以聽官府之六計弊羣吏之治一曰廉善二曰廉能三
曰廉敬四曰廉正五曰廉瀟六曰廉辨

以聽官府之六計者以上八成聽政役聽出入之治而著其治狀曰官計凡六條目也弊止也斷也猶言治狀之止處也廉察也善有淑德孟子云可欲之謂善能者能行政令敬不懈于位也正無傾邪也法守法不失也辨者事至能斷不為物所惑亂也舊謂六事以廉潔為本非也豈有敬正而貪能守法而不潔已者弊羣吏之治而云廉猶上文經邦治而云聽也以灋掌祭祀朝覲會同賓客之戒具軍旅田役喪荒亦

如之七事者令百官府共其財用治其施舍聽其治訟
法者治官之成法也令百官府者戒也共其財用者
具也治其施舍者施其所當施舍其所當舍也舍謂
國中有貴者賢者服公事者老者疾者在所舍也凡
事嚴而不辨財用而不給施舍之不當而有治訟治
者在所理訟者在所爭皆小宰受而聽之
凡祭祀贊玉幣爵之事裸將之事

玉幣爵三者以禮神王祀五帝則大宰贊王小宰復

助大宰以贊也裸用鬱鬯祀先王所用將則用瓚裸者王所以酌鬯於圭瓚之事將者人臣持以灌於地之事王親酌灌所以致敬昔者商人尊神交於明故先樂而求諸陽周人尊禮交於幽故先裸而求諸陰凡祭鬯人共秬鬯鬱人共裸器者入鬱草以和鬯酒祀天地則陳而不裸祀先王則有裸將之儀與其節大宰無裸將文互見於此

凡賓客贊裸凡受爵之事凡受幣之事

助冢宰贊此三事王待賓亦有裸以事神之道交之敬之至也

喪荒受其含襚幣玉之事

含襚所以贈死者王喪諸侯有致含襚幣玉之事凶年諸侯亦有致幣玉之事受者小宰專受之以復于上大宰無荒禮之文互見於此

月終則以官府之叙受羣吏之要贊冢宰受歲會

小宰宰夫職文並以專達者居前從長者居後如

宮刑所專典式所從月要所專歲會所從

歲終則令羣吏致事

大宰則令百官府此則令羣吏歲終季冬十有二月也既於月終以叙受其要又于歲終以叙受其會先令後受使無違慢

正歲帥治官之屬而觀治象之灋徇以木鐸曰不用灋者國有常刑

正歲建寅之月得四時之正以成歲功也治象之法

大宰所縣於象魏者也帥其屬則易從官從而民可知徇警之切也木鐸金口木舌國有文事則振之以警衆也縣之魏闕則有目者無不見徇之木鐸則有耳者無不聞每歲孟春必觀象徇鐸以儆動萬民之耳目於觀感之下人事歲功於此乎履端率作也夫治官之法大宰既懸象以示之小宰乃以身而帥之帥者喫緊致詳蓋有取於耳目聲色之外而敷求於躬行踐履之間聖人慮或帥之而不從徇之而不知

則又申之以辭命曰不用法者國有常刑常刑者一定不易之刑也仁聲善教反覆詳盡其著於人心者深矣按大宰有正月之文小宰變文曰正歲同是建寅之月以觀象之事足徵也蓋大宰布治而縣之小宰帥屬而觀之自是同時之事非有先後之異凡經中變文之類放此

乃退以宮刑憲禁于王宮

乃者亦更端也退者既徇而退也宮刑者職首所掌

也禁禁之使不犯也治外不遺內舉遠不忘近正歲
縣治象於雉門之外宮中有不見者故縣象徇鐸之
次以宮刑表縣之於宮中也

令于百官府曰各脩乃職攷乃灋待乃事以聽王命其
有不共則國有大刑

職如醫師醫為職膳夫膳為職法成法也待其事者
若徵令復逆其來無常者皆曰待也君命無俟苟有
聽聞而不共于此三者則用大刑此曰大者君親臨

之宜莫大焉

宰夫之職掌治朝之灋以正王及三公六卿大夫羣吏之位掌其禁令

宰夫掌凡攷之事下大夫四人為之法為位次禁令謂若王南面三公北面東上卿大夫西面北上羣吏在其後之位禁之使不干于法令之使不愆于禮叙羣吏之治以待賓客之令諸臣之復萬民之逆

法者朝位禁令治者待令與復逆之三事此三條皆

宰夫職之總名目凡夏審司士大僕小臣秋官小司
寇朝士司儀之屬所掌皆掌其法而叙其治事令者
令于下也既掌治朝之法於王日聽朝則正其位賓
客朝聘莫先焉故叙致其令也先賓客而次羣臣之
復如說復于王之復也報之義也羣臣羣吏之次州
長衆庶皆在焉故次以萬民使咸得通達其情無壅
蔽也

掌百官府之徵令辨其八職

官則有正師司旅府史胥徒之名府則有治要治凡
治目治數治藏贊治治序徵令之所掌辨者上徵某
人則辨曰某人為某官上令某事則辨其某事在某
府或以名舉或以叙及各致其辨無迷亂也

一曰正掌官灋以治要

正各官之長其屬之所取正譬於治官則冢宰教官
則司徒也法如治官則治法教官則教法也要者事
之綱治之總會處也

二曰師掌官成以治凡

官必有師如宰夫鄉師之屬成者成事品式物之模範凡者分總衆條之名 項安世曰官成即日成月成歲成

三曰司掌官灋以治目

司者有司若宮正宮伯以下各治一職行一司之事法如膳有膳法醫有醫法酒有酒法之類 王昭禹曰一官有一官之法目如網之有目官長分其事而

與之治司乃治其一條一目

四曰旅掌官常以治數

旅者衆也如旅下士之屬旅則遵奉故常視例而已
五曰府掌書契以治藏

契者憑驗如酒正云凡有秩酒者以書契授之是也
凡府之事非契不行

六曰史掌官書以贊治

鄭鐸曰史主文書者 歐陽謙之曰書契以後天下

之事紀錄之浩繁文移之往復記古昔之昏昏傳千里之恣恣要豈小補八職獨史稱贊治良有以哉

七曰胥掌官叙以治叙

掌大小官職尊卑之次叙

八曰徒掌官令以徵令

正當也長也師衆也貳也司者有官府之名目為各屬之長旅者百執事之屬各任所執之事司與正同為長而大小不同師與旅同為衆而上下有異要與

綱目為數是凡之目府庫非契不受政令非書不行契者得其凡要書者詳其數目才智可為胥則發施有叙役使謂之徒則走趨視令已上三節言掌治朝之法則與小宰掌治王宮之政令為有等言叙羣吏之治稱羣吏則避尊者言掌百官府之徵令稱叙及徵令則胥徒之事此宰夫職之所得專達者以下四節掌治法市法之吉賓吊喪之禮歲終之法正歲之法皆是為天官之攷而從其長之事

掌治灋以及百官府羣都縣鄙之治乘其財用之出入
凡失財用物辟名者以官刑詔冢宰而誅之其足用長
財善物者賞之

治法大宰治官之法攷者會稽勾攷之也掌其法以
攷其治都縣鄙三等采地羣者槩舉之也六遂五百
家為鄙五鄙為縣四鄙為都乘猶計也算法乘除之
名始此財有物用有名辟名者謂以虛為實指甲作
乙書契財物不相應也足用者用度不闕謂不失財

也長財者長猶養也謂蓄藏有法善物者善無惡也
謂納受不苟乘其財用之出入者所掌治法在此也
於失財足用二者攷見百官府羣都縣鄙之治狀以
告于冢宰視八法之官刑而誅賞之舊說財泉穀也
用貨賄也物畜獸也雖於財用物三字為順而上文
既單言財用則財為見物用為用度其出入之義自
明故不取舊說

以式灋掌祭祀之戒具與其薦羞從大宰而眡滌濯

式法九式之法戒具見太宰掌者非掌其物也掌以法攷其如式不如式爾從大宰而眡滌濯以式法贊大宰也

凡禮事贊小宰比官府之具

凡五禮之事皆助小宰比校百官有司之所共具此事之應攷而非職之所專達則執其式法贊小宰而為之攷

凡朝覲會同賓客以牢禮之灋掌其牢禮委積膳獻飲

食賓賜之殮牽與其陳數

牢有飪有腥有牽委積給賓客道用者禾米芻薪之
等膳食之善者獻禽獸也飲食者享食之禮如公食
大夫之食殮食也春秋傳曰殮有陪鼎是也牽餼牽
也謂牛羊之屬生致者陳者陳設數者品秩數目牢
禮者總名也在道曰委積致館曰膳獻既聘有飲食
贈送曰賓賜此皆行人掌客之職宰夫掌其禮以其
式法而攷之無過不及 或曰牢禮王饗諸侯之禮

按經曰五合諸侯而饗禮則具十有二牢庶具百物
備是也其句曰牢禮委積曰膳獻飲食曰賓賜之殮
牽賓賜者好賜也唯其膳獻以事君故下文又起意
賓賜掌客掌四方賓客之牢禮餼獻飲食之等數凡
諸侯之禮上公五積皆眠殮牽三問皆修羣介行人
宰史皆有牢殮五牢食四十簋十豆四十鉶四十有
二壺四十鼎簋十有二牲三十有六皆陳饗餼九牢
其死牢如殮之陳牽四牢米百有二十筥醢醢百有

二十甕車皆陳車米眡生牢牢十車車秉有五簋車
禾眡死牢牢十車車三秬芻薪倍禾皆陳乘禽日九
十雙殷膳大牢以及歸三饗三食三燕若弗酌則以
幣致之凡介行人宰史皆有飧饗餼以其爵等為之
牢禮之陳數唯上介有禽獻夫人致禮八壺八豆八
簋膳大牢致饗大牢食大牢卿皆見以羔侯伯以下
以是為等

凡邦之吊事掌其戒令與其幣器財用凡所共者

弔謂以弔禮哀禍災者戒所當共令所當具幣帛器
具賜貨用物凡所必用者皆共之

大喪小喪掌小官之戒令帥執事而治之三公六卿之
喪與職喪帥官有司而治之凡諸大夫之喪使其旅帥
有司而治之

有司羣吏也

歲終則令羣吏正歲會月終則令正月要旬終則令正
日成而以攷其治治不以時舉者以告而誅之

鄭鍔曰總一歲之治者謂之會會言合聚之衆也總一月之治者謂之要要言綱領之詳也總一旬之治者謂之成成言事緒之就也 應龍曰治者職業也會要成三者皆當攷攷歲會以歸之大宰攷月要以歸之小宰若日成則已職之所專理以日成旬以旬成月以月成歲其有歲終而不成歲會月終而不正月要旬終而不正日成雖有治狀謂之不時令之而不飭于治攷之而不協于正雖以時至謂之不舉不

時舉者以告于治官之長而誅責若後世之違時令
失期會者也令之而後攷不徒攷也不時舉者誅之
不徒令也

正歲則以灋警戒羣吏令脩宮中之職事

正歲孟春之月小宰帥治官之屬而觀法徇以木鐸
以宮刑憲禁宰夫贊其事以法警戒羣吏之職班令
使修宮中之事宮中之事本非宰夫之職特以正歲
助小宰施令而已

書其能者與其良者而以告于上

能有道藝而見於事者良有德行而見於事者書謂
記其姓名某也能某也良告謂以所書之姓名又告
于上以俟他擢用夫如是小大之臣安得不咸懷忠
良也

宮正掌王宮之戒令糾禁

正者宮官之屬於是乎取正凡言正者皆其屬官之
所就正也王宮對王內言之也戒儆戒令命令糾察

糾禁防禁此一節是其所掌之綱 劉氏曰飭人以畏慎之謂戒齊之以遵守之謂令誥之以過差之謂糾遏之以違誤之謂禁斯其所掌也

以時比宮中之官府次舍之衆寡

比者以此校彼比之欲其均也官在王宮者府者司存次者掌直舍者其所居寺也衆寡者名物之數也次舍有定處衆寡有定名其比較有定法如春秋潘崇掌環列之尹如漢光祿勳諸郎謂之郎衛職衛尉

主衛士謂之兵衛職 或問宮正所謂官府之在王
宮者得非治職於王宮以給宿衛與曰劉氏之說亦
善劉氏曰宮中而有官府者奉上之物用有不可以
遠者如膳夫宮伯庖人內饗王府之類是也次謂八
次所以待宿息也舍謂八舍所以待休沐也皆在宮
中其人有時而衆寡不同故持其增減而殺之 胡
仁仲曰先王之制凡官府次舍列于庫門之外所以
別內外嚴貴賤也今宮正乃比宮中之官府次舍之

衆寡又曰去其奇袤之民則是妃嬪與官吏雜處而
內外亂矣殊不知宮正所掌者宮中徒役之民與典
婦功典絲典泉染人屨人等官皆士人也皆有室廬
官署在內雖在宮中不應與妃嬪雜處漢郎吏舍衛
士廬周匝殿內自後世而觀亦豈與妃嬪雜處蓋此
有兩項一項是公卿大夫士之子弟國子貴游為之
分置八隅宮伯領之所謂掌王宮之士庶子至授八
次八舍之職是也一項是官府之在宮中徒役為之

錯置于士庶子八次八舍之職間環衛於區廬以周
王室宮正領之所謂掌王宮之戒令糾禁至教之道
藝是也大抵兩項人皆是環列之衛至於人主切身
侍御僕從却令掌於大僕而屬於司馬故宮伯所掌
在漢時所謂郎衛宮正所掌在漢時所謂兵衛固悉
領于太宰至春秋時猶存其制如潘崇為大師掌環
列之尹是也 陳君舉曰漢制猶有周官遺意以衛
尉教衛兵如周官宮正之職以光祿勳掌郎從宿衛

如宮伯之職而大司馬以三公都試郎從羽林兩衛
城門宮衛北門軍兵屬焉近周制官正宮伯之權統
於小宰矣

為之版以待

此以上是宮中職之要

夕擊柝而比之

二木相擊以示儆禁若後世之酉點者

國有故則令宿其比亦如之

故者事之適至非常事也令者以其故命於在版者宿者宿衛宿衛常事於有故而特云令宿何也常事則番休更直有故則百官有司皆在焉如文王世子云諸父守貴宮貴室諸子諸孫守下宮下室是也比者比其人之在否

辨外內而時禁

辨外內外不干之內內不交于外時禁如擊柝在夕振木鐸在春秋夜行則以燭之類以上是戒令糾察

禁之節

稽其功緒糾其德行幾其出入均其稍食

治職業者已成見功未成見緒緒者成事之端也稽之以儆其怠慢糾之使無差慝幾伺察也幾其出入之迹慎作止也均則無貧窶稟稱事所以勸也四者之序先其事而後其食所以教也或曰稽其在官之功緒以糾其德行幾其名籍之出入以均其稍食去其淫怠與其奇衰之民

去者去其惡使不為使之不為是即去也淫過也過則侵官怠慢也慢則曠職考而得其功緒之淫怠察而見其出入之奇衰則去之以上一節是戒令糾禁之目

會其什伍而教之道藝

會計也道者應事接物各有當行之法猶道路也藝如禮樂射御書數之類會其什伍者比其衆寡之目也二五為什則比於衆五人為伍則比于寡比亦附

也教之道藝不徒會也會而計之使得有比以相從
更番上直遞休入學學在公宮南虎門之左教有師
保氏之官而宮正之戒令糾禁行焉書曰綴衣虎賁
克用常人為其常有常心也侍御僕從罔匪正人有
以導之正道也

月終則會其稍食歲終則會其行事

月終則會以求月成歲終則會以攷歲成月會稍食
不月會則失出入之實歲會行事通一歲則見功狀

之完稍食行事者互見其文會其行事不徒食也會其稍食以稱事也此一節是以時比之目

凡邦之大事令于王宮之官府次舍無去守而聽政令大事如小宰七事之屬無去所守守其常也無敢去者以從政也聽政令者無敢後也聽而後行無輕動也

春秋以木鐸脩火禁

春秋二時大火出入之候春火將出則以木鐸徇于

王宮之官府次舍使因火之出而有脩治焉懼其始出而暴怒秋而火入則又以木鐸警之使因火之入而有脩治焉懼其入而有餘烈鄭司農以讀春秋以木鐸脩火句禁凡邦之事蹕按云季春出火此用木鐸當時孟春脩者預為之防也

凡邦之事蹕宮中廟中則執燭大喪則授廬舍辨其親疎貴賤之居

凡邦之事合上文有故有大事言之也凡國有事而

動官衆事在外則鳴蹕以止行人嚴清衛事在宮中
廟中則執燭以察幽隱備非常此上皆時禁之目也
徐筠曰宮正掌王公之戒令糾察自宮正至掌次
凡三十官此王宮之官也內宰掌王內之政令自內
宰至夏采凡十九官此王內之官也大府至掌皮凡
十一官亦隸於王宮而皆總于大宰掌財賦出內之
官也

宮伯掌王宮之士庶子凡在版者

鄭鏐曰士謂諸吏之適子庶謂諸吏之庶子 應龍
曰伯亦掌也士庶子者公卿大夫元士之適子庶子
入衛王宮學以授其世業者管子曰處士於官府是
也版猶名籍凡在版者謂在王宮又有公族之正室
支庶有國子之賢者能者有庶人之在屯衛者執技
能者給役使者皆著其籍

掌其政令行其秩叙作其徒役之事

政令者行其秩叙作其徒役之事也徒衆也所謂公

徒役趨使也諸解俱以作徒役之事為天子所用役自是諸子之職已上是職之綱凡諸官職首一節皆是提一官之大要

授八次八舍之職事

次者執掌所直舍者宿衛區分次如次于陘之次舍如舍于郊之舍鄭司農以在內為次在外為舍皆是約而言之即如康王即位八人立於門堂階垂可見八次之大畧如漢掌張衡云兵衛八屯可見八舍之

遺意八次八舍之人各有所任之職所執之事宮伯授之為行其秩叙之事也

若邦有大事作宮衆則令之

此作其徒役之事也

月終則均秩歲終則均叙以時頒其衣裘掌其誅賞

秩者以位制祿均秩所以佐宮正之均其稍食也叙者才氣等第也均叙佐宮正之稽其功緒也宮伯月終歲終則均之宮正月終歲終則會之均者乃齊整

焉以待其會也夏時頒衣冬時頒裘若後世之賦冬
夏衣也賈氏曰賦班也宮正會其行事宮伯行其
誅賞誅賞者大宰之法小宰所掌建國之宮刑於此
奉而行之也

欽定四庫全書

周官集傳卷三

元 毛應龍 撰

膳夫掌王之食飲膳羞以養王及后世子

膳言善也善牲肉以饌謂膳致滋味以進謂羞食飲膳羞四者食物之總名養者奉養王之身體后天下之母配王而內治世子者王之繼體及者致養之道如養王之法凡飲食之道食養陰氣飲養陽氣膳羞之物地產以養形天產以養精合天地陰陽之妙於

割烹煎和之間順時令法造化輔血氣毓神明作陰德不使勝於陽作陽德不使勝於陰致養於鼎俎之末端民本於臣民之上膳夫掌之凡庖人所供內甕所辨外甕所陳亨人所執皆總其法大宰統之其於王身為至切是所以保其身體厚為輔翼而歸諸道者也

凡王之饋食用六穀膳用六牲飲用六清羞用百有二十品珍用八物醬用百有二十甕

羞者致滋味之名百二十品者或云臠臠腳脩之等
雉兔鶉鴛爵鶉蜩芝栢之屬散見於禮記內則等篇
中者愚謂當時六畜六獸六禽之物割烹煎和之異
體名肉物之別旅陳之為百有二十之數珍羞者膳
羞之別名此一節釋上文四物之目也臠許云反羊
臠也臠許堯

炙豕臠也腳音香牛臠也鴛爾雅云鴛也鶉
鶉屬蜩蟬也芝栢芝水芝栢無華而實者

王日一舉鼎十有二物皆有俎

朝食一殺牲而三時進之中夕食雖有備味之養不

更殺也正鼎割烹之鼎陪鼎煎和之鼎俎以盛物取
於鼎以實俎曰唯一舉則不多殺鼎俎有數則不極
配肥甘之欲且以集九州四海之美味以天下養一
人而必定其名物度數焉 鄭鍔曰案禮記郊特牲
鼎俎奇而籩豆耦者鼎俎以盛牲體牲者動物之屬
乎陽者也其數亦奇今則十有二何也攷於禮家之
數牛一羊二豕三魚四腊五腸胃六膚七鮮八腊九
所謂正鼎九也又有腳一臠一曉一所謂陪鼎三也

或九或三其數皆奇不以奇為言而合之以十二者
豈非以示人君之尊宜法天之故歟觀天子衣之十
二章門之十二重馬之十二閑冕之十二旒則鼎俎
之奇以十二為言意可知矣

以樂侑食膳夫授祭品嘗食王乃食卒食以樂徹于造
鄭氏曰侑猶勸也應龍曰司樂王大食三侑是也禮
飲食有祭示有所先膳夫授所為祭之物如殷祭肝
周祭肺是也祭所以仁鬼神也祭而食無終食之間

違仁也品者物品品嘗者物物皆身嘗之為盡己之職愛君之道也賈氏曰鄭司農云徹置故處謂造食之處即厨是也應龍曰徹而復於造為知其所嗜知其所廢也王昭禹曰王之食也以禮而侑徹也以樂則禮樂未嘗斯須去身也王之所養蓋可知矣

王齊日三舉

三舉者非殺牲以養之謂也備品物之薦舉鼎俎如朝食之禮者三盛典禮而薄滋味也所謂割不正不

食魚尾不盈尺不殺薄味以養神精意以致純也此
與下文一節言食之變

大喪則不舉大荒則不舉大札則不舉天地有裁則不
舉邦有大故則不舉

不舉謂若殺禮而不備物聽樂為自貶損如禮曰歲
凶年穀不登君膳不祭肺後世亦有減膳徹樂之文
所謂樂以天下憂以天下也

王燕食則奉膳贊祭

燕食饗燕飲食之禮所以親宗族兄弟四方賓客也
上文授祭是朝食有牲殺而祭也奉膳贊祭是有燕
禮而祭祭而燕食也

凡王祭祀賓客食則徹王之胾俎凡王之稍事設薦脯醢
此賓客為來助祭者稍事是待客之禮設薦脯醢是
待王之事

王燕飲酒則為獻主

燕義云使宰夫為獻主宰夫亦膳夫也王燕食則奉

膳贊祭王燕飲酒則為獻主通為饗燕之禮以上四節亦通為有賓客之事而掌食飲膳羞之目也春秋傳魯公在齊飲酒使宰獻而請安公如晉是齊以食大夫者待魯公也

掌后及世子之膳羞

稱膳羞者示與王同牢而不特殺也

凡肉脩之頒賜皆掌之

牲肉脯羞王以自養者養賢謂鼎肉也頒者膳夫掌

受命而頒之賜以君命將之也

凡祭祀之致福者受而膳之

鄭鐸曰臣下有自祭其先而王賜之禽者既祭則歸
胙於王 應龍曰致福如都宗人凡都祭祀致福於
國家宗人凡祭祀致福是也祭畢則歸胙於君謂之
致福致福者歸美報上之義受而膳之者享其誠以
成其政也少儀曰凡為人曰祭福為已祭而致膳於
君子曰膳凡膳告於君子主人展之以授使者於胙

階之南南面再拜稽首送之反命主人又再拜稽首
其禮大牢則以牛左肩臂臠折九个少牢則以羊左
肩七个牯豕則以豕左肩五个

應龍曰臠肩脚也九个者取肩自上斷折

之至蹄為九段也臠奴報反牯豕集韻
說文豕三歲為特特敵德反或作牯

以摯見者亦如之

摯群臣朝見所執者大宗伯以禽作六摯是也其羔
鴈雉鶩雞之屬雖微物而百代不刊之典故亦授之
以供王之膳致福者愛君摯見者敬君也受之者享

之也膳之者善之也

歲終則會唯王及后世子之膳不會

歲終則會會其六穀六牲酒醬醢醢出入之數謂與下飲食之官為長故當會也唯王及后世子之膳不會者蓋為牲則會為膳則不會庖人王及后之膳禽不會惟膳不會未膳而為禽則取之有司者烏得不會唯共上之飲酒之出於酒府者不會不言世子者於此已見世子之文不重為見也餼食侍食人子之

事祭祀父母洗腆父母之慶不待舉其文而已見也
何以見共上之酒非會也下文共其計是也

庖人掌共六畜六獸六禽辨其名物

應龍曰六獸鄭司農以為麋鹿熊麋野豕兔康成以
狼易熊干寶以麋易麋六禽司農以為鴈鶉鴝雉鳩
鵠康成引未孕曰禽以為羔豚犢麋犢雉愚按經曰
大禽公之小禽私之當是六畜馬牛羊豕犬鷄之大
者曰六獸小而未孕者六禽至於狼兔之屬野物之

數不畜於國獸人共之也此其物皆有名號物色凡經文多有一句之中自分綱目者類此庖人所辨名物與內饗不同

凡其死生麇薨之物以共王之膳與其薦羞之物及后世子之膳羞共祭祀之好羞共喪紀之庶羞賓客之禽獻

凡者發其凡死者此謂田漁所進之已殺者生全者按廣韻麇亦作鮮凡此四物乾濕相資故名爲膳后

世子不言薦為有所從也

凡令禽獻以灋授之其出入亦如之

法者式法也此即所謂當獻之數也入者謂所屬以所令之禽至則再以此法校數之出者謂致於賓則又以此法比數之

凡用禽獻春行羔豚膳膏香夏行牂鴈膳膏臊秋行犢麋膳膏腥冬行麋羽膳膏羶歲終則會唯王及后之膳禽不會

春宜羔豚物生而肥則膳以牛脂其臭香牛屬土秋
宜犢麋物成而充則膳以鷄膏其臭腥鷄屬木夏宜
牯鱗膜熱而乾則膳以豕膏其臭臊豕屬北方水冬
宜鱸羽水涸而性定則膳以羊脂其臭羶羊屬南方
火上八物皆未孕之禽得四時之氣為尤盛為人食
之弗勝以下四物皆大獸之屬得四氣之廢是以用
休廢之脂和王相之物鷄亦為獸者鷄之類自分小
大凡氣休王相乘為得其宜此凡共膳羞之法膏臊

鄭司農云豕膏也

內饗掌王及后世子膳羞之割烹煎和之事辨體名肉物
辨百品味之物

割以授烹煎以致和肉割而有體名烹而有肉物煎
和而有百品之別曰百品味者百詳於名品詳於物
味詳於肉辨者各致其別識

王舉則陳其鼎俎以牲體實之

陳叙設之也

選百羞醫物珍物以俟饋共后及世子之膳羞

賈氏曰俟待也預選知當王意所欲者以待膳夫共

王之饋

辨腥臊羶香之不可食者牛夜鳴則廝羊冷毛而毳羶
犬赤股而躁臊鳥鵲色而沙鳴狸豕盲眊而交睫腥馬
黑脊而般臂螻

鄭鍔曰辨者必辨毛色聲音之間鄭司農曰廝朽木
臭也謂若牛無事夜鳴者其肉如朽木臭鄭鍔曰羊

取柔毛者美若其毛本稀冷末毳結者其肉必穢惡
狸謂氣不通泄應龍曰豕聽物宜俯睛不合望視而
暝交今米猪在在有之四臭之不可食者此六牲之
疵癘為臭惡者不食也

凡宗廟之祭祀掌割烹之事凡燕飲食亦如之

鄭鏐曰宗廟祭祀掌其割烹則事死如事生燕羣臣
而飲食亦掌其事君臣之禮不以宴而廢矣

凡掌共羞脩刑臠胖骨鱠以待共膳

刑脊肉臠膋肉胖破牲體之半或曰骨肉相半或曰
脯而不乾乾濕半之骨骨物鱠乾物待膳夫之共
王膳食則掌共羞也

凡王之好賜肉脩則饗人共之

膳夫所掌饗人是供

外饗掌外祭祀之割亨共其脯脩刑臠陳其鼎俎實之
牲體魚腊凡賓客之飧饗饗食之事亦如之

饗食既聘而饗謂三饗三食三燕之禮飧饗致於館

饗則王親饗之饗人掌之如祭之事

邦饗耆老孤子則掌其割烹之事饗士庶子亦如之

鄭鍔曰錄其功而念其親則有時設盛禮以饗之重其為死者之親也士庶子宮伯之所掌者錄其宿衛之勞則饗之亦如耆老孤子之禮應龍曰饗者祭

畢而饗也禮曰春禘而秋嘗春享孤子秋食耆老

師役則掌共其獻賜脯肉之事凡小喪紀陳其鼎俎而實之

師所以用衆役所以任衆凡師役必祭祭而饗食如
獻禽饁獸及勞還之屬則有獻賜或曰獻言祭賜言
饗也

亨人掌共鼎鑊以給水火之齊

劉原父曰六牲大小不同則水火斯有其齊矣齊數
得所則生熟適中而不失其味焉 應龍曰凡生物始
殺而腥之在鑊體解而熟之在正鼎致味而煎和之
在陪鼎各給其水火之齊齊者無過不及之度

職外內饗之饗亨煮辨膳羞之物祭祀共大羹鉶羹實
客亦如之

職者以是為任饗用水火由饗有烹煮之名烹者孰之
煮者孰甚辨膳羞之物者饗人則解以授烹必有名
物亨人孰以授饗亦辨其名物以復之凡膳之物共
膳羞之物共羞

甸師掌帥其屬而耕耨王藉以時入之以共齎盛

王藉者王親耕之田天子躬秉耒而三推之以首事

甸師任終畝之役必借民力之助焉王藉千畝每十畝借一家之力計上地之農家可任者三人為徒三百人也唯復有番休之地則再易之為三千畝又為三百夫之力粢致精潔盛致馨熟 劉氏曰甸人列於亨人之次者祭祀以粢盛為本故也 或問甸師掌王藉以時入之賈氏云十月穫之送入地官神倉集傳引賈氏說乃去地官字何也曰月令季秋命冢宰舉五穀之要藏帝籍之收於神倉政不必拘地官

為說

祭祀共蕭茅共野果蓏之薦

蕭香草以合黍稷馨聞達於牆屋茅包茅三脊炳蕭
合黍稷祭脂以求神於陽束茅縮酒灌地以求神於
陰王藉之間若疆場有蕭茅果蓏之屬皆培植時取
以共祭祀之用野者甸師職在郊野在樹曰果桃李
之屬在地曰蓏壺瓜之屬

喪事代王受眚哉

歐陽謙之曰甸師所掌乃耕籍之主為粢盛之用古人憂深慮遠於國家遭喪之後乃禱於神以為前日之黍稷不馨所以獲罪於神者皆已之故非王之咎若降青眚已當受之應龍曰青如目有赤眚之眚哉天地大哉代如以旦代某之身受青眚弭後哉也此禱禳之事起於古人愛君忘身之義遂為典故王之同姓有臯則死刑焉

王同姓者有臯獄成則掌囚者奉以適甸師氏刑於

隱處不與國人慮兄弟也死刑二事 鄭鏐曰甸師

掌耕籍與祭薦之物以奉宗廟刑之於甸地非特隱
之又以明宗廟之法雖親有所不恕也或問甸師同
姓死刑云二事何也曰王氏曰有罪謂犯五刑則刑
殺不必市朝此言死刑焉謂死及肉刑
帥其徒以薪蒸役外內饗之事

左傳云其父析薪即大木可析曰薪自然小者曰蒸
應龍曰按膳夫掌飲食之官在內而於王身為切

者甸師代王耕籍之官在外而於王身為切者此序
官之法先親而後疎先內而後外

獸人掌畧田獸辨其名物冬獻狼夏獻麋

結繩而為網畧則佃漁之始制畧者畧田器之長也
田獸田取獸物也辨其名物者狼麋之等物者禽
獸之異

春秋獻獸物

春秋溫涼適中萬物生成之時凡獸皆可用凡獻以

充庖皆順四時之宜以輔四氣之羸不足

時田則守畧

時田者以時而田也古者非時不田守畧者獸之所聚有所辨擇取舍曰豺祭獸然後田獵鳩化為鷹然後設罝羅四時之田各有名法三田之用各稱其事不廢禮亦不暴天物故曰時田

及弊田令禽注于虞中

鄭司農曰及弊田植虞中於其中致禽而珥焉應龍

曰珥者取左耳以致功若斬首獻馘之謂鄭鑄曰注者欲其趨赴之速如水之就焉

凡祭祀喪紀賓客共其死獸生獸

劉氏曰所獲生獸囿人育之於囿及其將用則獸人取之以共焉

凡獸入于腊人皮毛筋骨入于玉府

共其死獸生獸之餘凡獸入於腊人乾其肉以為腊凡田獸者掌其政令

凡田獵之政令皆掌之則凡任田獵之事者皆受政令焉

獻人掌以時獻為梁

劉氏曰網罟所得曰獻斷而取之曰梁 應龍曰結繩為罟偃水為梁皆盡魚之法也故專官掌之以有

禁令或問獻人掌以時漁為梁賈鄭二說如何

鄭氏曰月

令季冬命漁師為梁賈氏曰以時者謂一歲三時取魚

曰鄭所引月令季冬命

漁師為梁賈氏謂月令云是月命漁師始漁天子親

往文句不同義非是愚按王制獺祭魚然後漁人入
澤梁則為梁乃季冬之時義固通但取魚不必以季
冬為拘賈氏謂一歲三時取魚皆為梁以時取之又
不若鄭鍔之說為通鄭鍔曰王之膳羞祭祀賓客之
薦豈專於一冬哉所謂以時者有用之時不必冬之
一時也

春獻王鮪

春獻鮪者國之典故有專名則他名不獻鄭鍔曰爾

雅鮪頭尖如鐵口在頷下青黑色甲可治蠱大者不過七八尺

辨鰕物為鱣鼈以共王膳羞凡祭祀賓客喪紀共其魚之鱣鼈

物者名物鰕如春獻鮪之類鼈如夏行脍鱠之類凡鰕者掌其政令凡鰕征入于玉府

鄭鍔曰漁者取魚受政令於獸人稟命而行則無數畧竭澤之害如是則靈沼於物圉圉洋洋常有以共

禮食而不闕矣

鼈人掌取互物以時簠魚鼈龜蜃凡狸物春獻鼈蜃秋獻龜魚

鄭鍔曰獻人為梁鼈人用簠取魚以時應龍曰以時簠取而時獻之魚狸藏之如鱮之屬

祭祀共麇羸蜺以授醢人

螺蚌互物蜺子埋物授以為醢是皆宗廟之好羞典故所用鄭鍔曰三者物之微而祭祀亦用何也蓋

先王之祭內盡志外盡物物之微者無所不盡然後見其誠非為飲食之道也記曰不敢用常褻味而貴多品所以交於神明者非食味之道也殆謂是類爾掌凡邦之籍事

凡當用籍者悉掌其事歐陽謙之曰經嫌互物包括未盡故於官末言凡以包之

腊人掌乾肉凡田獸之脯腊臠脾之事

掌田獸之肉乾之以共用脯腊臠脾者乾肉之名物

凡祭祀共豆脯薦脯臠胖凡腊物賓客喪紀共其脯腊
凡乾肉之事

豆脯豆實薦羞之實四者舉其概言凡者舉其所列
之物言共者各有司取以共王之用

醫師掌醫之政令

政令如下文分治稽制之等亦若采取炮煉治療之
方也

聚毒藥以共醫事

毒藥療治之治諸毒之藥如寒暑毒諸物毒之屬醫以藥為主聚者俱收並蓄收之萬里之外蓄之百年之上共者待用無遺取給於顛沛之際活人於呼吸之頃 愚按舊以毒藥為五毒謂藥之物恒多毒非也本草所載藥之無毒者居多此是言攻毒之藥如言冰鑑乃盛冰之鑑又如食玉乃食用之玉物

凡邦之有疾病者疔瘍者造焉則使醫分而治之歲終則稽其醫事以制其食

言王國中之政則四方以是為法

十全為上十失一次之十失二次之十失三次之十失
四為下

伊川鄭氏曰醫以十全為上非謂十人皆愈為上若
不幸十人皆死病則如之何但知可治與不可治治
證分明十人皆中即為上 應龍曰醫師隸王宮之
官而職掌止及民物何也為臣子者善則歸君疾病
惡也為嫌有指斥故惟陳治法而泯於言隱然有忠

愛之意

食醫掌和王之六食六飲六膳百羞百醬八珍之齊

劉氏曰食醫者通知食物冷熱之性有所抑有所惡
鄭鏐曰人徒知病生於血氣之不調而不知實生
於飲食之過度藥之醫也醫於已病之後食之醫也
醫於未病之前應龍曰饗人所和調五味之和以致
口體之養食醫所和調四氣之和以助陰陽之理其
功在變理之末百羞百醬舉成數言之

凡食齊眠春時羹齊眠夏時醬齊眠秋時飲齊眠冬時
醬飲之屬皆性熱故宜涼宜寒凡調和之法必取正
於四時者象天之四氣生成萬物也

凡和春多酸夏多苦秋多辛冬多鹹調以滑甘

劉氏曰人者五行秀氣所結而成故其五臟五事應
於四時五行以春多酸以養肝夏多苦以養心秋多
辛以養肺冬多鹹以養腎

凡會膳食之宜牛宜稌羊宜黍豕宜稷犬宜粱雁宜麥

魚宜菰

齊也和也會也皆調一之義四氣適時為齊五味合調為和二物相成為會膳牛羊之屬食黍稷之屬

鄭鏐曰稌澤中所生黍禾屬而黏可以為酒故從禾

從水說文曰稷百穀之長沈括曰稷乃今之稌

子例反

朱氏曰稷似黍而小梁粟類有數色爾雅曰菰雕胡也鄭鏐曰菰米之生於水也應龍曰凡十有二物各以溫冷寒熱之性相配以氣味相成

凡君子之食恒放焉

君子以位言放者由是推而放之君子與王其貴賤之分為不同而所以養生之理則未嘗異故皆得以放王而自養焉

疾醫掌養萬民之疾病四時皆有癘疾春時有瘡首疾夏時有痒疥疾秋時有瘧寒疾冬時有嗽上氣疾

鄭鍔曰孟子云苟得其養無物不長凡疾病起於陰陽之偏勝抑其有餘而養其不足二者適平則疾自

愈矣四時皆有癘疾至冬時有嗽上氣疾癘者陰陽乖沴之氣在人為疾冬之時陰上陽下陰陽相逆於心肺之間其疾為嗽則上攻而喘急應龍曰春四時之首陽氣上行首為諸陽之所聚氣不和則有頭首酸削之疾夏時陽已極陰始生氣不和則有痒疥之疾秋時陰陽之氣不平陰盛陽伏氣不和則有瘧寒之疾冬時陰已極陽始生氣不和則為嗽上氣喘逆之疾由四氣之代謝不齊五行之克制不當失風雨寒暑

之序乘陰陽燥濕之宜相傳而成四者之疾

以五味五穀五藥養其病以五氣五聲五色眡其死生
劉氏曰人五臟根自五行其氣有不足而為病也故
可以五穀五味養之氣既平病既却斯可矣不已則
有偏盛偏盛而不容於衆則反傷焉是故五行有相
生五臟亦相生五行有相克五臟亦相勝其傷而疾
病也或養其母而子自安其盛而偏也或養其傷而
盛自抑此五味五穀五藥迭相為用循環相生而養

人和平不復為病也應龍曰五味者五穀五藥各有
酸苦辛甘鹹之味養者以五行之生尅視五臟之羸
不足或養其母以固其子或養其子以安其母治國
者德不足輔之以刑治病者穀不足繼之以藥醫書
曰酸以收之辛以散之苦以泄之甘以潤之鹹以奠
乳充切之五穀五藥各因五味以達其藏亦養病之大
略也

兩之以九竅之變參之以九藏之動

兩者開塞也變者失其常也賈氏曰九竅之開是其常參者驗九竅之變與不變而以九藏之動參之也參之以九藏之動者三部六脉三三成九所謂三診九候也寸關尺浮中沈

凡民之有疾病者分而治之死終則各書其所以而入于醫師

鄭鍔曰此言分而治之則中士八人自分焉至於因醫以至死或非因醫而自終其天年使各書其不同

之狀史記所載淳于意對治疾之狀是已

瘍醫掌腫瘍潰瘍金瘍折瘍之祝藥劑殺之齊

腫瘀腫潰膿血出金刀創折骨傷損治上四傷用下
四劑祝者祝也古醫經祝由科是也謂若頭傷不任
用藥或在肯綮不任劑殺則以術攝五行之氣祝之
藥用五藥

凡療瘍以五毒攻之

深入曰攻凡瘍蘊毒而成必以毒攻去之

以五氣養之以五藥療之以五味節之

醫書云精不足養之以氣形不足養之以味瘍者血氣偏負之所致五味在五藥之中見之節者酸收辛散之等

凡藥以酸養骨以辛養筋以鹹養脉以苦養氣以甘養肉以滑養竅

木堅類骨金柔類筋潤下類脉炎上類火肉猶水火金木之載於土竅如地之有空五氣行焉故利之以

滑六者皆以類相從

凡有瘍者受其藥焉

四瘍之外凡有瘍者皆受藥雖治法有四齊之殊而必以藥為主

獸醫掌療獸病療獸瘍凡療獸病灌而行之以節之以動其氣觀其所發而養之凡療獸瘍灌而劑之以發其惡然後藥之養之食之

灌之以藥劑節之以馳驟灌以求其病行以致其遠

動其氣而視其脉觀其所發而養其所偏負慶鄭曰
陰血周作張脉債興是所發也

凡獸之有病者有瘍者使療之死則計其數以進退之
鄭氏曰獸之類不一其當醫者必有用之獸漢張里
以馬鑿而學鍾黃憲乃牛醫子則獸醫其為牛馬設
歟民之病與瘍則列為二獸之疾與瘍則一醫而兼
療君子之行仁固有等差應龍曰古者聖人仁民
而愛物又立之獸醫以弭物之癘懼其及人也其政

令視人為有等然欲其生而惡其死一也

酒正掌酒之政令以式灋授酒材

劉氏曰政令謂凡酒之材用法式出入之政令式五齊三酒四飲和合醞造之式

凡為公酒者亦如之

古無私飲凡飲必在公雖農事畢而飲如七月之詩曰曰殺羔羊朋酒斯饗躋彼公堂稱彼兕觥公堂為州黨之學也

辨五齊之名一曰泛齊二曰醴齊三曰盎齊四曰緹齊
五曰沈齊

辨此五次成熟之節一節為一齊齊成即可飲 鄭
鍔曰沈則不泛矣自泛而之醴自醴而之盎自盎而
之緹自緹而之沈非唯色不同也味亦不同也非唯
厚薄之不同也清濁亦不同焉其齊不同不可不辨
故使酒正辨之

辨三酒之物一曰事酒二曰昔酒三曰清酒

鄭鍔曰昔之為言宿昔之意清酒其色清明禮記所謂醖酒說於清醖酒盎齊差清酒人以清酒說之則知清酒之為清矣醖音仄產反說音稅歐陽謙之曰事酒或是專為一事而造之酒或是四時祭祀貴其專特為事而作酒故特以事名則昔酒清酒酒人歲計則常作之酒也不然清酒昔酒意不相屬矣

辨四飲之物一曰清二曰醫三曰漿四曰醕

漿人共王之六飲入於酒府此四飲有清而無水涼

醴者清即為涼醴則在五齊之中水則玄水故酒正
四飲不更著其名漿者米汁相載而為漿漿而成醴
醴而泝之曰清投以薄粥曰酏酏而泝之曰醫四飲
者五齊之始也三酒者五齊之終也三酒五齊泝而
後用若四飲則以久近共克化之齊三酒共人事為
燕飲之用

掌其厚薄之齊以共王之四飲三酒之饌及后世子之
飲與其酒

劉氏曰饌謂飲時所薦應龍曰饌其食也

凡祭祀以灋共五齊三酒以實八尊大祭三貳中祭再貳小祭一貳皆有酌數唯齊酒不貳皆有器量

以法共五齊三酒者夏后氏尚明水殷尚醴周尚酒以三酒沛鬱鬯五齊而用之如郊特牲所云縮酌用茅以下是也八尊者彝為上也尊次之罍為下也八尊五齊五尊三酒三尊故云以實八尊獻酌縮酌況酌修酌酌之名儀禮勺三酌實於尊中及九獻九酌

之類酌之六彝六尊二壘之屬謂之器器之升斗廣狹謂之量如勺一升爵一升之類 鄭鍔曰八尊之實本以祀神不以飲也三酒之用則不一始焉以酌獻終焉飲諸臣貴其有餘而不欲其噉是故大祭度用一尊則用三尊以為副貳中祭度用一尊則用二尊以為副貳小祭度用一尊則用一尊以為副貳祭之大則所酌者多祭之小則所酌者寡此所以等降然要之皆有酌數取足而無乏爾 歐陽地山曰五

齊三酒分而言之齊為五齊酒為三酒統而言之齊
可以亦謂之酒也唯齊酒不貳蓋所以指五齊而謂
之酒也

共賓客之禮酒共后之致飲于賓客之禮醫酏糟皆使
其士奉之

酏而涕之清者為醫滓濁為糟士其貳也

凡王之燕飲酒共其計酒正奉之凡饗士庶子饗耆老
孤子則共其酒無酌數

計者計其數度此計字為膳夫解中酒會飲不會之徵

凡酒之頒賜皆有灋以行之

法有尊卑勞佚

凡有秩酒者以書契授之

秩常給也書契者書其常數於契以授之使受於酒府也

酒正之出日入其成月入其要小宰聽之

周家酒政嚴故日入月入必於小卿聽其成若要也
歲終則會唯王及后之飲酒不會以酒式誅賞

會則冢宰受之式者節財用之式誅賞者治官府之
法歲終則會雖共王燕飲之酒其出於酒府亦有計
唯王及后之飲酒不會已共而飲則不當會 徐筠

曰酒之有禁不見之於酒官何哉禁飲酒於市有司
覈之職隸於地官幾酒謹酒有萍氏之職屬於司寇
司覈乃市官之屬與民相親萍氏乃刑官之屬有刑

可禁酒正以下則大抵女酒女漿奄奚之類皆王宮之官與民不相親但主乎為酒此其所以不掌其禁令而第掌乎酒之政令耳

酒人掌為五齊三酒祭祀則共奉之以役世婦共賓客之禮酒飲酒而奉之凡事共酒而入于酒府

鄭鍔曰凡事共酒則不一事也事不止於一皆共其酒 歐陽謙之曰酒人之所共酒有只共酒而不奉之者有共而奉之者有共酒以往者所謂共酒者酒

人但共其酒而奉其事者蓋不與焉是蓋酒正之所
掌如王四飲三酒之饌王燕飲之酒賓客之禮酒饗
士庶子耆老孤子之酒皆入其酒於酒正之官長而
聽酒正之官長自處酒人但共其物而已所以凡事
共酒而入於酒府大總言之也

凡祭祀共酒以往賓客之陳酒亦如之

宮中祭祀共之以役世婦在外之祭祀亦以酒共之
皆非自往也致禮於賓客亦使人以酒從往之非自

行也 劉氏曰亦如之亦如以往之禮

漿人掌共王之六飲水漿醴涼醫酏入於酒府共賓客之稍禮

鄭鍔曰六飲要之於利渴而已應龍曰漿人掌漿先之以水貴本始也由水用米米汁相載謂之酏

祖代反

漿米暫化汁向渾而謂之醴醴而沛之為涼投以薄粥曰酏酏而沛之清曰醫或曰涼者糗飯雜水則凡漿之屬皆然曰若今寒粥則酏其中也古者壺漿以

此今飲之以新陳相克化

按內則言水者凡十曰水曰漿又曰重醴曰濫濫其

涼乎又曰醴曰泰
配醫醴同音爾

共夫人致飲于賓客之禮清醴醫醴糟而奉之

夫人后也周官稱后又曰夫人猶稱太子又曰世子也蓋周建國之初據典故舊文雜見爾視前兼有清醴猶彼云四飲此云六飲也此漿人專職故於飲之名物為詳舉其文以互相足或問漿人共夫人致飲於賓客之禮則猶冢宰之有好賜予也諸家說皆不

明言夫人后也按玉人云夫人以勞諸侯鄭康成於
玉人注內亦言之但不明爾

凡飲共之

歐陽謙之曰凡國事有用飲者皆共之不必專指王
也

凌人掌冰

或問凌人掌冰政注云故書正為政句當作掌冰正
今從賈鄭說其掌冰為句何也曰鄭司農云掌冰政

主藏冰之政也義固通但以正連歲作正歲以表夏正文義猶為明順

正歲十有二月令斬冰三其凌

斬謂鑿取也歐陽謙之曰三其凌者是必三處為冰室一處所藏或有消釋尚有二處未必皆得消釋也春始治鑑凡外內饗之膳羞鑑焉凡酒漿之酒醴亦如之

劉氏曰春氣尚溫所以防饑敗也

祭祀共冰鑑賓客共冰大喪共夷槃冰

夷猶大也

夏頒冰掌事秋刷

頒以賜食祿之家刷除其舊俟更納新

籩人掌四籩之實朝事之籩其實麴蕡白黑形鹽膾鮑
魚鱠

八籩下四物皆魚歐陽氏謂籩中所載往往可食者
魚肉生爨似非籩中之物當攷朝事朝踐朝獻為互

文

饋食之籩其實棗棗桃乾榛榛實

先朝食為未食時則此饋食為未食所進 劉氏曰
饋食者朝踐後體解牛羊犬豕烹而熟之將獻時后
先獻籩八豆八以配王之薦熟也尸未入室之前王
與后再酌醴齊以獻謂之饋食也

加籩之實菱芡棗脯菱芡棗脯

內宗云掌廟之祭祀薦加豆籩加籩盛禮者也

羞籩之實糗餌粉簋

羞致滋味若中夕食所進者二物四列按儀禮少牢賓長致爵受酢宰夫羞房中之羞司士羞庶羞於尸此四說附見於此愚謂籩豆之設共凡王之饋食饗燕皆具如天子二十有六豆是也四籩之實類見內則不必專歸之祭祀若止為祭祀則下文不當重出賓祀之目

凡祭祀共其籩薦羞之實喪事及賓客之事共其薦籩

羞蘧為王及后世子共其內羞凡蘧事掌之

詩云蘧豆有踐賓客之謂也

醯人掌四豆之實

醯豆實不曰豆人而曰醯人蘧豆本一物而有竹木
陶鑄之異故以醯記曰恒豆之菹水草之和氣也其
以醯言醯陸產之物也加豆陸產也其醯水物也四
豆之實如下文

朝事之豆其實韭菹醯醢昌本麋藟菁菹鹿藿茆菹麋

醢

凡醢皆淹久之物菹猶苴也

說文曰菹酢菜玉篇曰酢酸也

肉物曰

醢有骨曰醢八豆之實韭也菹蒲根也蔓菁也茆也醢肉汁也麋麋也鹿輔陽麋輔陰

饋食之豆其實葵菹羸醢脾析麋醢蜃蜺醢豚拍魚醢應龍曰先王之制飲食其取物也類有食以助養者食其受二氣之先者食其惡以示戒者食其有害民物者皆有典故故禮曰可食也不可好也

加豆之實芹菹兔醢深蒲醢醢落菹雁醢筍菹魚醢

芹廣韻水菜食之宜丈夫

羞豆之實醢食糝食

劉氏曰醢食者酒漉諸粉以為食也糝食者米糝合
漬諸肉菜以為食也

凡祭祀共薦羞之豆實賓客喪紀亦如之為王及后世
子共其內羞王舉則共醢六十壘以五齊七醢七菹三
醢實之賓客之禮共醢五十壘凡事共醢

此在膳夫職中有醢事故特著其職之所專者與醢之名物

醢人掌共五齊七菹凡醢物以共祭祀之齊菹凡醢醬之物賓客亦如之王舉則共齊菹醢物六十甔共后及世子之醬齊菹賓客之禮共醢五十甔

禮曰醢醬處內醢醬者食之主也醢味鹹醢味酢又曰五齊七菹於醢人為醢在醢人為醢醬其總名凡事共醢

醯醢之物凡言共者入於膳夫而共也

鹽人掌鹽之政令以共百事之鹽祭祀共其苦鹽散鹽賓客共其形鹽散鹽王之膳羞共飴鹽后及世子亦如之凡齊事鬻鹽以待戒令

四方所產百事所用有若散形飴之別有受入共鬻之法是為政令徐氏音辨曰本草戎鹽一名胡鹽生胡鹽山及西羌北地

冪人掌共巾冪

巾冪以覆為用巾是冪之物冪者巾之事

祭祀以疏布巾冪八尊

聶氏禮圖曰此巾用二尺二寸之幅而圓也 應龍

曰巾疏不畫貴其質也八尊通六尊二疊言也記云
酒醴之美玄酒明水之尚貴五味之本也黼黻文繡
之美疏布之尚反女功之始也八尊名見司尊彝
以畫布巾冪六疊凡王巾皆黼

畫以雲氣貴臭也布精然後可畫蓋尊布疏則畫巾

布精可知此為畫布則黼巾刺繡可知

宮人掌王之六寢之脩

歐陽謙之曰脩者洒掃糞除之事

為其井匱除其不蠲去其惡臭

漏井通而流之匱豬四壅聚之井匱相受井有去故
維新之義匱有納淤藏疾之象惡臭者不蠲之積也
除其不潔以致其潔除其不蠲所以去惡臭也於以
潔寢處而通壅滯道血氣以交神明也

共王之沐浴凡寢中之事埽除執燭共鑪炭凡勞事四方之舍事亦如之

沐浴之處必為井匱沐用潘浴用湯潘漸米汁也

掌舍掌王之會同之舍設桎栝再重

林氏曰再重則內外環固矣 應龍曰桎猶陞也栝猶護也如今鹿角欄杆之屬

設車宮轅門為壇壝宮棘門為帷宮設旌門無宮則共人門

詩所謂敦彼獨宿亦在車下若兵衛輦是也

凡舍事則掌之

會同之外凡舍事悉掌之又按王宮五門王行所在亦如之桎栝一也所以外護車宮桎栝以內方三百步環以車為車宮車宮轅門又以外衛壇壝轅門之內環以墻壝若今小墻四面為門謂為壝宮壝宮戟門戟門之內達於九十六尺之壇壇三成幕人掌次之官供張帷幕於此四旁曰帷謂為帷宮四門立旌

旌者王遊幸所載由旌門而入至於王所環衛在列
輔弼左右則武士掌直如二人綦弁執戈上刃夾兩
階祀當升降之道亦謂之門此為備五門之制王行
所屈為止若宿則供張又隨事而異省置亦隨地而
異已矣

幕人掌帷幕幄帟綬之事凡朝覲會同軍旅田役祭祀
共其帷幕幄帟綬大喪共其帷幕帟綬三公及卿大夫
之喪共其帟

王在朝在廟在國在野皆共之

掌次掌王次之灋以待張事

王曰次者王盛主如日在天雖光輝無有不照而行
度必有十二辰之次

王大旅上帝則張氈案設皇邸朝日祀五帝則張大次
小次設重帟重案合諸侯亦如之師田則張幕設重帟
重案

歐陽地山曰王大旅於上帝鄭氏謂祭天於圓丘無

所經據然其為祭天一也雖大旅非圓丘之事不妨作圓丘之事其張設與此同也宗伯國有大故旅上帝及四望鄭氏謂上帝五帝也五帝之說出於周禮自詩書以上無聞唯月令有迎氣四郊之說鄭氏皆以祭帝解之至使後人有疑於六天之說然則大旅上帝均言昊天上帝又何嫌乎以此為昊天上帝彼為五帝乎

諸侯朝覲會同則張大次小次師田則張幕設案孤卿

有邦事則張幕設案

孤卿降於諸侯矣

凡喪王則張帟三重諸侯再重孤卿大夫不重

不言幕案則無矣

凡祭祀張其旅幕張尸次射則張耦次掌凡邦之張事
旅賦孤卿尸則賦王

欽定四庫全書

經部

周官集傳卷四

詳校官監察御史臣徐如澍

刑部郎中_臣許兆椿覆勘

謄錄監生臣任以依

監生臣吳壽康

欽定四庫全書

周官集傳卷四

元 毛應龍 撰

大府掌九貢九賦九功之貳以受其貨賄之入頒其貨于受藏之府頒其賄于受用之府

九貢五等諸侯所貢九賦畿服九等之賦九功萬民九職之所成者九職事也九功功也掌其副書以為受給之契要頒分也辨三入之貨賄分二府而受之貨自然之物金玉之屬歸之受藏之府賄人為之物

布帛之屬歸之受用之府受入為藏出給為用貨兼有賄如兵器之屬其入亦在受藏之數賄兼有貨如金玉財物其出亦在受用之數於文皆為互見

凡官府都鄙之吏及執事者受財用焉凡頒財以式灋授之關市之賦以待王之膳服邦中之賦以待賓客四郊之賦以待稍秣家削之賦以待匪頒邦甸之賦以待工事邦縣之賦以待幣帛邦都之賦以待祭祀山澤之賦以待喪紀幣餘之賦以待賜予

官府都鄙之吏及百執事之人掌國中四郊家邑邦甸邦縣邦都及關市山澤幣餘之賦者各以其所征之財至而受之

古書授與受通禮中文義多如此

凡分授其財於有

司則量所入之賦揆以九式之法給諸九事之用而以九式之法授之待者各待其百官有司以其事之徵令至則予之其中如祭祀之式用度為廣故用邦都之賦亦廣

邦都之地為方百里者三十有六

賓客之式名物為繁

故用國中四郊小都之賦而取具而分頒好賜弔用

又不預焉

凡邦國之貢以待弔用

以邦國之貢入待之此貢是諸侯因朝貢者鄭鏐曰
諸侯之貢其上者以待弔邦國之用亦以卹諸侯之
禍災而已

凡萬民之貢以充府庫

九職所成即閭師所任八等之貢也充實也

凡式貢之餘財以共玩好之用

以九式用九貢而有餘者則以共玩好之用玩好者
四海之巨麗千古之典刑玩之可以知戒好之可以
比德

凡邦之賦用取具焉歲終則以貨賄之入出會之

凡九式之用先以九賦取給故九賦無餘財

玉府掌王之金玉玩好兵器凡良貨賄之藏

玉府貴重掌凡美物之蓄藏而玉為之良歐陽地山

曰有司所用一不取於玉府意者玉府王之私藏若

後世之內藏庫是也王之食曰玉食王之語曰玉音
王之府曰玉府宜矣玩者目之所好好者心之所悅
兵若允之戈和之弓垂之竹矢之屬器若金鍾九鼎
玉律歌器之屬賈氏曰器者赤刀宏璧琬琰之屬良
貨賄則其質出於自然而美者藏者大府所頒而藏
之林之竒曰書曰玩物喪志而玉府掌玩好何也
蓋玩好人情所不免先王為之法度以節之則無溺
於玩好矣

共王之服玉佩玉珠玉

服玉王禮服所用之玉佩玉常所佩者珠大珠玉類
若明月之珠夜光之璧

王齊則共食玉

齊者所以齊一其心志致精致純以交於神明也林
之奇曰齊則食之所以助氣體精純之養應龍曰惟
辟玉食韋氏曰玉食珍異之食

大喪共含玉復衣裳角枕角柶掌王之燕衣服衽席牀

第凡褻器若合諸侯則共珠槃玉敦

槃如少者奉槃之槃敦者對也其形東西相對古者以槃盛水則珠飾之以敦盛食則玉飾之珠陰精所生玉陽精所化以二氣之精物為器示精一也

凡王之獻金玉兵器文織良貨賄之物受而藏之

林氏曰所謂獻者諸侯之職獻其國所有之物也則玉府受而藏之應龍曰王之獻謂諸侯獻王如賜賓而云賓賜獻王而云王獻也

凡王之好賜共其貨賄

九式曰好用大府曰賜予此合而言之曰好賜謂所
賜皆金玉玩好兵器凡良貨賄之物故玉府共之王
昭禹曰好用出於王之私恩惟其時物而已典絲云
凡上之賜予皆以物授之典泉賜予亦如之蓋以玉
府所受好賜則玉府共之以內府所受好賜則內府
共之用絲則典絲共之用泉則典泉共之若此之類
固非一也

內府掌受九貢九賦九功之貨賄良兵良器以待邦之大用

大用如用五兵之物則必有軍旅之事用禮樂之器則必有祭祀之事國之大事惟祀與戎故曰大事

凡四方之幣獻之金玉齒草兵器凡良貨賄入焉

齒象齒草皮草熊羆狐狸之屬或問玉府凡王之獻金玉兵器鄭注以為王獻遺諸侯何也曰歐陽氏之辨詳矣歐陽氏曰凡王之獻若曰王所受諸侯之獻

下于上曰獻上于下為賜三尺童子知名分所係

不可移也

如宋朝富弼奉使爭獻納二字

而鄭氏謂王所以獻遺諸

侯果何据乎鄭意特拘於內府凡四方幣獻之說嫌於與玉府同獨不思所謂獻有玉府所當受者有內府所當受者鄭說率不同莫此為甚非惟文義不明混惑後學而輕於立為淆亂名分之論以開僭竊之端不可不深辨

凡適四方使者共其所受之物而奉之

使者受王所以遺諸侯之物

凡王及冢宰之好賜予則共之

好即好用之式賜予亦與賓客羣臣為好所用者曰
王及冢宰之好賜予其文義亦云王及冢宰廢置一
也好賜之事具在九式凡王事皆冢宰詔贊而佐之
非王有好賜予冢宰亦又有一種好賜予好廢置非
王有廢置冢宰又別有一種廢置也

外府掌邦布之入出以共百物而待邦之用凡有灋者

鄭鐸曰周家之財賦大抵出於九貢九賦九功至於
泉布之入則如載師所言凡宅不毛者有里布如閭
師所言凡無職出夫布與夫紵布質布罰布廛布之
類則出於布而已 王氏曰百物者百工之資凡國
家營作器物以所受之布共給之有官府之常法者
給非常法者不給

共王及后世子之衣服之用凡祭祀賓客喪紀會同軍
旅共其財用之幣齋賜予之財用

衣服常服也齋資也三宮衣服之用五禮幣齋之用與賜予之用即上文共其百物以待邦用之目財者言其布也用者言其用也三等衣服五等幣資及其賜予者言其所共物之事緒也

凡邦之小用皆受焉

上文五禮皆大事也何云小用云小用者共其工事之資爾工事小事故云小用稱凡者何上云百物其名未究故稱凡以總之鄭鍔曰王或賜予而用泉

布又邦之小用費財不甚多者皆受於此信夫周家
邦布之入寡不若內府貸賄之多矣

歲終則會唯王及后之服不會

為用則會為服不會曰唯王及后者尊之也不言世
子從父母可知也或問外府即賄之府內府即貸之
府布是布帛之總名謂布為女功之始也

司會掌邦之六典八灋八則之貳以逆邦國都鄙官府
之治

鄭鏐曰小宰掌典法則之貳以逆邦國都鄙官府之
治司會又掌逆治無以異於小宰何也嘗攷司會以
中大夫下大夫為之掌天下之大計而為計官之長
欲括天下之財用而會計其數不可不掌典法則之
貳也小宰執其貳以佐大宰之治使人不敢動搖其
已成之法而司會則鉤攷之官掌其貳以會天下之
財其語雖同其事則異也

以九貢之灋致邦國之財用以九賦之灋令田野之財

用以九功之瀦令民職之財用以九式之瀦均節邦之財用掌國之官府郊野縣都之百物財用凡在書契版圖者之貳以逆羣吏之治而聽其會計

四者之法及書契版圖在大宰之官府別有副書主天下大計之官以逆羣吏之治狀以聽其會計之事以參互攷日成以月要攷月成以歲會攷歲成

徐氏音辨曰互交相也 林氏曰要者一月之計也應龍曰參互者以舊章額數與入數出數又以在官

者及在甲在乙者三者相參兩者相互而考之

以周知四國之治以詔王及冢宰廢置

廢置王法也以當詔告於王者贊冢宰以詔告焉

司書掌邦之六典八灋八則九職九正九事邦中之版
土地之圖以周知入出百物以叙其財受其幣使入於
職幣

九正即九賦正者征也有事而後有式九事即九式
也

凡上之用財用必攷於司會三歲則大計羣吏之治以知民之財器械之數以知田野夫家六畜之數以知山林川澤之數以逆羣吏之徵令

此序其財之目也三年一閏天道小成天道尚有積差况吏治乎財者財物若九職所就者器若禮樂器械若兵器農器如閭共祭器族共喪器黨共射器州共賓器鄉共吉凶禮樂之器之類田野一夫百畝之數夫家家三人家二人之數六畜若二羴五雞之數

以及山林川澤廣狹高下之數徵令稅歛之事天地
之間財有定數不在民則在官可逆彼以知此 歐
陽氏曰民財欲知其數則民之貧富可知此聖人富
之之意也器械知其數蓋車輦兵器之屬也小司徒
登其車輦遂人簡其兵器蓋可見矣田野之數孟子
所謂土地闢田野治土地荒蕪田野不闢今計其數
欲知其闢且治者有幾也荒蕪且不治有幾也夫家
之數則鄉遂歲時登其夫家之衆寡此聖人庶之之

意也山林川澤鄭說然矣以此數者參互而考之則吏治之善否可見而暴征橫斂之病民者可以悉攷而除之矣

凡稅歛掌事者受灋焉及事成則入要貳焉凡邦治攷焉

法者十一十二二十而三二十而五之法事成而入其最要則受其貳以攷知其治狀此所以受其幣之故

職內掌邦之賦入辨其財用之物而執其總以貳官府都鄙之財入之數以逆邦國之賦用

林氏曰先王之賦民皆有職各以其物當賦以便其出賦之人則職內於邦賦之入則必辨其財用之物不亦宜乎 應龍曰總者事之綱準入知出準王國知侯國 歐陽氏曰職內掌賦入非受藏之府蓋主其物數者辨其財用之物而執其總蓋財用之數入於職內者也官府都鄙皆受財入然當官亦藏以為

用不以歸於職內者也邦國之君賦取於民以為用
是又邦國財用之數也在已者執其總在官府都鄙
者貳其數在邦國攷其賦取於民當與不當而已
凡受財者受其貳令而書之

其有官府合用官物而受財者必得其副書而後與
之而籍記之貳鄭鏐曰凡受財於此必有君之令如
後世合同憑由取財於左帑也職內不受其貳令而
書之則他日鈎考無以為証

及會以逆職歲與官府財用之出而叙其財以待邦之
移用

以入準出以此校彼是為逆法 歐陽氏曰官府所

用財受於職內歲終而會計乃於職歲之官取所出

之數而攷之

所謂貳令未必非自職歲而來蓋職歲主財出也

既攷職歲財

出之數又取官府財用之出數而攷之蓋官府既受
財以共用則必有出其所受之財而用之之數所以
受於職內者其數如此而職歲之出數又如此官府

之用數又如此驗其同否庶幾於財用之際無所欺
矣

職歲掌邦之賦出以貳官府都鄙之財出賜之數以待
會計而攷之凡官府都鄙羣吏之出財用受式灋於職
歲

鄭鍔曰職歲之官專以掌財賦之出者也不謂之職
出而謂之職歲者蓋出財當以歲計也總計一年所
出之數知其有餘不足然後冢宰於歲之杪得以制

用焉此名官以職歲之意也

凡上之賜予以叙與職幣授之

幣餘之賦以待賜予故也此叙而授之者何職在掌

出故也

及會以式灋贊逆會

歐陽謙之曰出財之式灋在職歲故凡諸官之受財者皆先就職歲受式灋焉故會計之際職歲必用已所掌出財之式法以參贊會事則所出之成數有定

而用財數可見矣 應龍曰歲會掌於大宰其書則
掌於司會而司會或不知其出之式法故職內及會
以逆職歲與官府財用之出職歲則以式法與職內
同贊司會而已先王經天下之政莫重於理財凡有
所用必有其式凡有所治必有其法

職幣掌式灋以斂官府都鄙與凡用邦財者之幣

劉氏曰官府都鄙或月或歲皆積羨餘及凡用邦財
以興事役者則有餘物皆謂之幣則掌斂而聚之也

歐陽謙之曰職幣所掌之式灋即大府職歲之式灋也大府之頒財於官府既授之以式灋諸官府之出財用又復受式灋於職歲今職幣復案式法計其已用之多寡而歛其餘焉於末言凡用邦財者則以大總言之也周人於財用之際若此其嚴非苛且吝也不苛於出納之際乃所以不輕於征歛之際也

振掌事者之餘財

徐氏音辨曰舉而歸之曰振

皆辨其物而奠其錄以書楬之以待上之小用賜予

劉氏曰書楬之謂書其目以標楬之

歲終則會其出凡邦之會事以式灋贊之

司裘掌為大裘以共王祀天之服中秋獻良裘王乃行羽物季秋獻功裘以待頒賜

鄭鏐曰良言玉之致美為至尊之服也或曰行羽物當是班之工作林氏曰以待頒賜賜羣臣也

王大射則共虎侯熊侯豹侯設其醵諸侯則共熊侯豹

侯卿大夫則共麋侯皆設其醵大喪獻裘飾皮車凡邦之皮事掌之歲終則會唯王之裘與其皮事不會

射義曰天子大射謂之射侯天子將祭必先習射於澤宮澤者擇也朱氏曰畫布曰正棲皮曰醵皆侯之中射之的也

掌皮掌秋斂皮冬斂草春獻之遂以式灋頒皮草於百工

鄭鍔曰秋則獮田之時獸之方殺者衆於是而斂皮

冬則堅凝之時草乾者堅於是而斂草

其其毳毛為氈以待邦事歲終則會其財齋

方治皮為草時得其毳毛可為氈貯之以待祭祀賓客會同田役共氈案之屬

內宰掌書版圖之灋以治王內之政令均其稍食分其人民以居之

書典故也版名籍也圖地圖也書以治政令版以均稍食圖以辨人民之所居法者所以治之均之分之

則人民者士庶子宿衛之等及王內之官屬閹寺奄
奚工賈府史胥徒之類

以陰禮教六宮

劉氏曰六宮主王后也而三夫人在焉后雖尊而四
德甚備不敢怠於聽學者日新其德業以為六宮之
範故詩稱尊敬師傅言告言歸者以為后妃之美周
公所以擇下大夫之賢以為內宰而教成王之后者
此書其實也

以陰禮教九嬪以婦職之灋教九御使各有屬以作二
事正其服禁其奇褻展其功緒

鄭鐸曰周制自王后六服而下等降上下固有常制
不可紊也上僭之禍率起於衣服之間衛刺綠衣謂
其服之不正耳奇褻謂妖褻巫術以自衒媚應龍曰
奇觚則怪而不常褻僻則媚而不正如漢武帝後宮
為方術所誤致巫蠱之禍作猶起也己成為功已作
為緒林氏曰展其功緒所以核其事也或曰二貳也

貳者佐佑六宮為聽從於人之事

大祭祀后裸獻則贊瑤爵亦如之

此皆教嬪御之事也凡祭宗廟王既裸王出迎牲於
祭祀若有間然后而從裸不令間獻謂王薦腥薦熟
后亦從獻也及尸卒食王既醕尸后以瑤爵亞獻其
爵以瑤為飾瑤次玉者曰贊者非內宰自贊之乃上
文以陰禮教之目也

正后之服位而詔其禮樂之儀贊九嬪之禮事凡賓客

之祿獻瑤爵皆贊致后之賓客之禮凡喪事佐后使治外內命婦正其服位

皆禮之叙教之目也

凡建國佐后立市設其次置其叙正其肆陳其貨賄出其度量凜制祭之以陰禮中春詔后帥外內命婦始蠶於北郊以為祭服歲終則會內人之稍食稽其功事佐后而受獻功者比其小大與其麤良而賞罰之會內宮之財用正歲均其稍食施其功事憲禁令於王之北宮

而糾其守上春詔王后帥六宮之人而生種蒔之種而獻之于王

次三市之次叙三市之治叙肆賈人所居設也置也正也陳也皆始立之名案律厯五量籥合升斗斛左氏齊四量豆區釜鍾布帛廣狹之幅曰淳長短之制曰制林氏曰天下熙熙皆為利來天下攘攘皆為利往市之所在天下之民不求而自來天下之物不求而自至度量之不明淳制之不正則何以立民信

而使之無欺歟出其度量淳制則民信立而三尺童子適市莫之或欺矣應龍曰陰禮者祭地示之禮也
林氏曰祭始立市者報本反始之義也

內小臣掌王后之命正其服位后出入則前驅若有祭祀賓客喪紀則擯詔后之禮事相九嬪之禮事正內人之禮事徹后之俎后有好事于四方則使往有好令于卿大夫則亦如之掌王之陰事陰令

閹人掌守王宮之中門之禁喪服凶器不入宮潛服賊

器不入宮竒服怪民不入宮凡內人公器賓客無帥則
幾其出入以時啓閉凡外內命夫命婦出入則為之闕
掌埽門庭大祭祀喪紀之事設門燎蹕宮門廟門凡賓
客亦如之

寺人掌王之內人及女宮之戒令相道其出入之事而
糾之若有喪紀賓客祭祀之事則帥女宮而致於有司
佐世婦治禮事掌內人之禁令凡內人弔臨於外則帥
而往立於其前而詔相之

鄭鍔曰禁令者其所當為宜有以令之其所不當為
宜有以禁之應龍曰內人弔臨為有所受命而行者
立於其前猶前導然寺人之職云帥女宮者女宮之
戒令也曰禁令者糾之之事也帥而往而立於前者
相導之事也

內豎掌內外之通令凡小事若有祭祀賓客喪紀之事
則為內人蹕王后之喪遷于宮中則前蹕及葬執褻器
以從遣車

外而王內而后通使令者內豎為童而給事者止可
小事 鄭鏐曰內人雖賤而微然亦至尊所用者固
不可使人得而犯之也此所以使內豎蹕焉 應龍
曰內人出自中禁故以童子為之蹕而寺人為之帥
且相也

九嬪掌婦學之灋以教九御婦德婦言婦容婦功各帥
其屬而以時御叙于王所

鄭鏐曰九嬪於婦道為明於宮中有師道 劉氏曰

御幼少故立婦學而以四德之法教之應龍曰教凡
在九御之列者善其德言容功各帥其屬而以時御
叙之於王所也屬者世婦二十七人為一屬女御八
十一人為一屬而女御又為世婦之屬世婦又為九
嬪之屬九人當御又為一屬九御即御之叙也九御
而進御於君俱以九九為叙周官立婦學之法大槩
謂可當九御之叙者非色取也取於有德有言有容
有功謂之賢才謂之淑女則可以其時其叙進而在

御應在天之運備從人之道成陰陽化育之功立萬
世人極之本夫以時則不亂以叙則無妬詩曰關關
雎鳩在河之洲又曰參差荇菜左右流之參差荇菜
左右芼之此為行中度聲中律容有禮事有功時稱
而叙順則天下無私禮故曰有關雎麟趾之意以行
周官之法度若徒致詳於九九而御以為叙一月再
周以為時而不求之於四德之學非周禮也

凡祭祀贊玉盥贊后薦徹豆籩

贊薦而為之徹

若有賓客則從后大喪帥叙哭者亦如之

九嬪從后如卿從王叙哭猶御叙也

世婦掌祭祀賓客喪紀之事帥女宮而濯概為盥盛及祭之日涖陳女宮之具凡內羞之物掌弔臨于卿大夫之喪

女御掌御叙于王之燕寢以歲時獻功事

鄭鍔曰王之后宮雖六而王之燕息別有寢寢有六

其一為正寢其五皆為燕寢也嘗攷周制王不就后宮以息燕是故自后而下各以時而御見於燕寢之中卑者先進以法月方生之明尊者後進以法月既盈之盛女御掌之欲其進見有先後之序也

凡祭祀贊世婦

鄭鍔曰世婦於祭祀時或帥女宮以共役或泣陳女宮之具羞其事甚繁女御則佐而助之故曰凡祭祀贊世婦

大喪掌沐浴后之喪持翣從世婦而弔于卿大夫之喪
喪大記註曰翣以木為筐廣三尺高二尺四寸方而
兩頭高衣以白布畫者畫雲氣即畫翣其餘各如其
象即黼翣黻翣翣柄長五尺車行使持之而從以障車
既窆樹于壙中障柩徐氏音辨曰以布覆之為方扇
之狀持以從柩

女祝掌王后之內祭祀凡內禱祠之事

內祭祀若祭市祭先蠶之類內禱祠若疾病求瘳若

祠高禘之類女子聰明通鬼神而之居能祝事者后從王祭祀則女祝從后如王之有大祝小祝也

掌以時招梗禴禳之事以除疾殃

時者謂四時有乖沴之氣為疾殃則以四者之事除之四者如後世以桃茢祓除不祥之類鄭鍔曰男覲于冬則堂贈于春則招弭事殆類此聖人豈不知巫祝之非正尚有招梗禴禳者蓋人之精爽或失其正則淫厲之物得以乘隙而入以致疫殃故巫祝

之類亦不可無非以為致福之由也亦欲以除疾殃而已故於男巫則曰以除疾病女巫則曰以除疾災歐陽氏曰禱祠以除疾殃事雖茫昧然坐視疾殃之至而付之於無如之何聖賢之用心蓋不如是也周公代王之事其用心亦可見矣女祝任招梗檜禳之職其招者一而梗檜禳者三而又專為疾殃而為之亦可見徼福之意簡而除患之心切

女史掌王后之禮職掌內治之貳以詔后治內政

禮陰禮職婦職史掌文書凡內治之政令皆有其貳
林氏曰治內政后也女史則詔之應龍曰詔猶告也
此以下為貳內治之目

逆內宮書內令

書以法記言之史

凡后之事以禮從

以達陰禮以法記動之史

典婦功掌婦式之灋以授嬪婦及內人女功之事齋

謂法者其資用及成就舊數嬪婦乃九職之嬪婦此
嬪婦乃外工言及以殊之內人內工也曰女功之事
齋者齋為資若絲枲之類鄭氏以嬪婦為九嬪世婦
諸人多從之愚謂不然鄭鏐曰內宰作之以二事九
嬪教之以婦功典婦功授之以事齋音咨必有以授
之於其始乃可以責之於其終也或問典婦功掌婦
式之灋以授嬪婦集傳所釋嬪婦不取古註鄭說而
併鄭鏐之論不取何也

鄭鏐曰言嬪即九嬪也言婦即世婦也彼皆學女功於宮

中則宜給以布帛之資非民間任化治之職者也上言嬪婦下言內人非王宮之嬪婦而誰歟曰王

宮之九嬪世婦比隆卿大夫之職有婦功則從后夫人之後按內宰以作二事及婦功唯據九御而言不見九嬪世婦有絲枲之事故知典婦功所授嬪婦乃九職之嬪婦也

凡授嬪婦功及秋獻功辨其苦良比其小而賁之物書而揭之

良善也賁者別其直也揭者題署以表物也辨其苦

良則苦功良功各歸所典比其小大則尺度中數若不中數各以類分此皆賈之事也凡賈始入而揭者時賈也謂所受之物有毀折入資則如初之賈獻功又賈揭之者校之資本相當與否且以待頒也

以共王及后之用頒之于內府

鄭鍔曰其精者以共王及后之用其餘則頒之於內府者以其良貨賄之所藏故也內宰言比其大小與其麤良而賞罰之此言辨其苦良比其小而賈之

者內宰則佐后宮官之長故得以行賞罰典婦功掌
頒事齎則定其賈可矣至於賞罰不得而與也

典絲掌絲入而辨其物以其賈褐之

鄭鍔曰辨其物而定其價則綿帛苦良各隨其所宜
授以本物則有司不得以苦易良以賤買貴受賜者
亦得以霑上之賜矣應龍曰歲常入之絲或貢或買
或以當賦入者故各以其物識其賈而表出之

掌其藏與其出以待興功之時

劉氏曰繡文組織以機杼染玄黃各有所宜之時

頒絲于外內工皆以物授之凡上之賜予亦如之

歐陽氏曰案典婦功有工四人縫人有女工六十人是所謂內外工也不必言外工嬪婦內工女御也應龍曰內工王內之人物者女工合用之材資也歐陽氏曰所謂以物授之者著其名物以授之防其以賤質貴以惡易美故也

及獻功則受良功而藏之辨其物而書其數以待有司

之政令上之賜予

良物材之美者功者因其材而成功或問典絲良功之說北海鄭氏與鄭司農說各異如何曰二說各為一義皆通但司農之說只從經文良功釋尤善

凡祭祀共黼畫組就之物喪紀共其絲纁組文之物凡飾邦器者受文織絲組焉歲終則各以其物會之

徐氏音辨曰纁綿也

典枲掌布總縷紵之麻草之物以待時頒功而授齎

布總縷紵四等成就布三十升總十五升布而抽其半縷績紡所為紵白而疎簾者麻始刈穫之材草葛蒨之屬麻草之物初治而為紵再治成縷三治之成總粗疏之布僅及十五升布之半四成之精而十五升三十升至三十升布之極善矣頒功以其度授資以其物 王氏曰故書齋為資當以故書為正及獻功受苦功以其賈楬而藏之以待時頒頒衣服授之賜予亦如之歲終則各以其物會之

苦言物材之粗者良功亦入於典婦者若供朝衣冠之布及帷幄巾幘之屬按諸解例以苦良之苦為麤鹽不供上用非也詩曰為絺為綌服之無斃后妃何嘗不服粗綌之衣良當是物質自然之美用力省而成功者苦是女工勞苦所就者如銘曰桑蠶苦女工難之義謂若麻冕禮也用三十升布其經二百四十縷為細密而難成今也純儉純絲也用功省約而易就此即苦良之辨

內司服掌王后之六服祿衣揄狄闕狄鞠衣展衣緣衣素沙辨外內命婦之服鞠衣展衣緣衣素沙

林氏曰以翟之羽色揮散而明故以翬名之以翟之形體搖揚而飛故以搖名之 聶氏圖說展衣曰此亦卿大夫之妻從夫助君祭宗廟得服之 徐氏音

辨曰衾如庶反純也衾也皆訓緣蓋黑衣以纁為衾以其有衾故謂之純衣 林氏曰先王制衣服豈苟然哉聞其名則知其義觀其服則知其禮性命之禮

道德之義於是乎在應龍曰王之吉服九九陽數也
后之吉服六六陰數也王服禪而不裏后服裏而不
禪王上玄下纁不相連屬后上衣下裳連屬一色不
屬者有定位之象連屬者有合德之象裳之屬於衣
也有削幅如深衣要半下齊之制也其翟之數如王
服之章凡十二章者以十二翟為列內司服鄭氏以
為王宮裁縫官之長何也歐陽氏曰女御或是八十
一御女中二人同掌之鄭氏之說鑿矣或問內司服

辨內外命婦之服止有鞠衣展衣緣衣而外之諸侯
夫人或得用三狄何也曰歐陽謙之之說是矣其說
謂王后之服有褱衣揄狄闕狄蓋曰從王祭祀之服
也而辨內外命婦之服止有鞠衣展衣則內自夫人
以下蓋無助祭之禮則不得服闕狄以上則在外之
命婦亦豈得而服之哉然則經言辨內外命婦之服
止言鞠衣展衣緣衣其意亦可見但外之諸侯夫人
或有從其君祭祀得用三狄如祭統曰君衮冕立於

卷四
昨夫人副禕立於東房蓋上公與王同服袞冕則上
公之夫人宜與后同服禕衣也下而侯伯子男之夫
人亦有用屈狄之制其意亦同

凡祭祀賓客共后之衣服及九嬪世婦凡命婦共其衣
服若喪衰亦如之后之喪共其衣服凡內具之物

九嬪世婦當賓祭從后者命婦兼內外言之

縫人掌王宮之縫線之事以役女御以縫王及后之衣
服喪縫棺飾馬衣嬰柳之材掌凡內之縫事

染人掌染絲帛凡染春暴練夏纁玄秋染夏冬獻功掌
凡染事

染絲先染後織染帛先織後染暴練者練其素而暴
之玄纁者天地之色纁絳也染用石物考工記鍾氏
染纁夏者備五色謂之夏翟染之擬五色之羽為深
淺之度春溫宜練夏暑熱潤宜湛研秋水清大備五
色冬水凝洄而獻功

追師掌王后之首服為副編次追衡笄為九嬪及外內

命婦之首服以待祭祀賓客喪紀其笄經亦如之

應龍曰服三翟皆用副衣展用編衣祿用次笄衡唯施於三翟鞠衣則無衡矣命婦之衣鞠衣展者服編衣祿者服次笄長尺有二寸純用三采瑱以石若玉屨人掌王及后之服屨為赤舄黑舄赤纁黃纁青白素屨葛屨辨外內命夫命婦之命屨功屨散屨凡四時之祭祀以宜服之

屨事省故通任王及后之用曰服屨者屨稱其服冕

服赤舄皮弁白舄冠弁黑舄褱衣玄舄揄翟青舄闕翟赤舄 林氏曰總者屨相接之縫也應龍曰其飾用對方之色者績飾之用相生之色者繡飾之 歐陽謙之曰掌屨之官以王與后之屨而兼掌之可見其事簡而為屨之制略矣以玄袞赤舄與赤舄几几之言觀之則舄之制自赤舄之外不見具有異色則赤舄為王之舄黑舄為后之舄亦不辨而明矣

夏采掌大喪以冕服復于太祖以乘車建綏復于四郊

